

## **Paurongo Firipi Kpebung Yeneac Kibi Ohoec**

<sup>1</sup> Yesu Kristoac wanacngic Pauro nga Timoteo, nereng kibi yomoc faidipe, imoc Firipi taonnu kpetiac areng sasawa nga kpebunggac enarafocngina amma kpebunggac memefic ngicngacfocngina Yesu Kristogoc kpeketahema kecdae, ngenearu hade.

<sup>2</sup> Mannina Anutu nga Kebunina Yesu Kristo yereac danggunuc nga ruae ngenearu febeso. <sup>3</sup> Ni ngeneac negensianduae, naso imohai Anutuna ubangerec edeanduae. <sup>4-5</sup> Siduc gombunggac ua hanaheaiunac erema yaguc ande, ngeni nigoc ua areng mocgu mema kefing, imocac amma ngeneac negensima sogac sogaigoc numuanduae. <sup>6</sup> Amma yofi negensinggeduae, Anutungo ua gombunga ubaherenginau hanahema imoc torokpema mekengkefu Yesu Kristoac nasotoa hau, imohai uaya imoc mesidarude. <sup>7</sup> Ni ngeneac ifi negemma herenau baringunuma kecbade imoc ngereede. Witicamau kecbade me mitiac ngabaareng yenearu siduc gombunggac hania dekperagibade me siduc gombung ngenearu meseribade imohai ngeni sasawango nigoc Anutuc wosoefacfu areng mocgu kecnide.

<sup>8</sup> Anutungo hepucna kecde. Yesuac wosoefacfu heirima ngenigoc kecbadeac ubasongona fede, imoc fora deduae.

9-10 Nga faka damocngo gombunga ande, ngeni imoc naric isinggegedeac yofi numuanduae, ngeni heresongogoc hoangemema kecbisia. Nga songo imocngo yadima negen negeng kpeu keme kemea meficgeu Anutuac sing negentegegede, ifi numuanduae. Ngeni ifi negentegecma Yesuac nasotoa hasikeu kongaha nga kopocsicngina kpac nanggede. <sup>11</sup> Nammagec dindingac kekecac fora Yesu Kristoac kpacfu mewakengunuude. Imocngo Anutuac kibikperagi nga dedengerec meficgeude.

<sup>12</sup> Tosofocna, nearu faka fingerec, imocngo siduc gombunggac ua monggoc meseriu yadie. Ngeni imoc negenggedeac songona ande. <sup>13</sup> Yadiu ngicngac ngictauac oda manau kecdae\* amma ngicngac noboc noboc kecdae, yeni sasawa bic yofi hentegegede, “Ngic imoc Kristoac amma witicfu kecdae.” <sup>14</sup> Witicamau tacduaeac tosofocnina homac negen negengngina Kebuaru seriec. Serima Anutuac yoac kengeha kpac dekecdae.

<sup>15-17</sup> Ni seria namma siduc gombung dekperagibadeac Anutungo fainuec, yeni imoc negemma sing dindingac wosoefacfu Kristo dekperagikecdae. Tosea yeneng ine keracmanganggoc nga ngabau negen negeng kpeengkpeama witiau Kristo dekperagidae. Dekperagima neac yofi negensidae: Ye ebic hania hania meficgeminide. <sup>18</sup> Yeni Kristo herenginaunac mi dekperagiandae me sing forau

---

\* **1:13:** Ngictau yeac oda manau yengena amagereha fec. Amma ofis hania hania nga witicama amma ua arengac ama fekenec.

Kristo deandae, imocac homac mi debesonga, yeneng Kristo dekperagidae, imocngo wiac engena ande. Ifi negemma yofinenggac sogaiduae amma monggoc sogaidade. <sup>19</sup> Ifi ammagec ngeneac nunumu nga Yesu Kristoac Asungo meficnude, imocac yofi negensiduae, witicfunac yungecnugecde. <sup>20</sup> Nga songotoana yofi fede, wiac monggac me monggac negemba gameagoc mi ande. Ni ine kengeha kpac kecma kekecfu me homecfu sebinango Kristo kpac kuneng mibade.

<sup>21</sup> Kekec yomohai Kristogoc kecduae nga homecngo forana meficgenenude. <sup>22</sup> Nga sebigoc kecma ua meba fora homac fingerudeu imocac dafi debade, imoc mi negentegecduae. <sup>23</sup> Songo yohockangngo kpedzinuu kecduae. Kemma Kristogoc kecbadeac homac anende, imocngo wiac sasawa ferahema ngereeyombonggede. <sup>24</sup> Nga ngeneac gombungac amma sebigoc monggoc torokpema kecbesare. <sup>25</sup> Imoc seria negenyombonggeduaeac bangecfu ngicngac sasawa ngenigoc kecma meficngunuba ngeneng negen negensingoc kecma yadiseri amma sogaima kekecde. <sup>26</sup> Nga ngenearu monggoc hama kecbadeac ngeni nenggec imocngo songo meficngemmeu Yesu Kristoac amma kekecngina meseriude.

<sup>27-28</sup> Ni hama ngenembade me hereau kecma ngeneac yoaciduc yofi negembeso anduae, ngeni ongaasu mocgu nga ubahere mocgu kecma ngabafocngina yeneac mong mi kengecngunumanu serima namma yeni siduc gombung negensinggecdeac ewema

kpendzenggoc uatoa mekecdae. Imoc fingerudeac ngeni Kristoac siduc gombang imocac siriha kecbisia. Faka imocngo ngabafocngina yofi edzacyunuude: Yeni manganema kpac anggecde nga ngeni ine komoc kpegecde. <sup>29</sup> Ngeni Kristo meficgegecdeac areng yofi ngemme ngemmea fede: Ngeni ye negensinggema ifingoc yeac amma kpendzeng kpegecde. <sup>30</sup> Warac uau kpendzenggoc kecec uatoa mekefai imoc kicngo henggec amma yaguc mekecduae imoc negendae, siriha ifiangoc ngeni yaguc mekecdae.

## 2

<sup>1-2</sup> Kristongo meseringunuma heresongogoc hoangngunukecde. Nga Tiri Asungo hama kpeturangngunuu ngeni ubamangang negengemema wosoefac angemegecde. Imocngo botucnginau negen negeng mocgu nga uba mocgu amma heresongogoc hoangemegec ubangerec hafoa negembade. <sup>3</sup> Ngeni kuneng tatacac amma kichodung mi ambisia nga sebiengenggoc mi kecbisia. Ngeni faka imoc wama memaemema ngicngac ogofocngina yeneac kpac miacma ngenang kpac memama kecbisia. <sup>4</sup> Ge geangga wiacsac mi garenggebesena, ogofocga yeneac wiac ifingoc meficyunuma garenggebesena. <sup>5</sup> Yesu Kristoac faka nga negen negeng fede, faka nga negen negeng siriha imocngo ngenearu febeso. <sup>6</sup> Yeng Anutugoc siricngira mocgu kecoc nga ye Anutu kekeha kefec imoc segereudeac mi negenec.

- <sup>7</sup>Ye yengena kekec wama wanacngiac siric meec.  
Amma ye ngic sebi mema ngic siric fingeru henggec.
- <sup>8</sup>Ye yengenaoc memaemema Anutuac yoac modackecma homec meficgema mariponnu homeec.
- <sup>9</sup>Imocac amma Anutungo ye miacma engenatoa gununggeec amma kpac kuneng miec, imoc kpac sasawa ferahedacde.
- <sup>10</sup>Anu yeni kurumennu nga bangecfu amma bangec bageau kecdae, yeneng Yesuac kpacfu fafoc heidacgecdeac ifi anec.
- <sup>11</sup>Ifi anecac ngicngac sasawa yeni enacnginango Yesu Kristo ye Kebu, ifi dekperagigec dedengerec imocngo Anutu Manggacac ambesande.
- <sup>12</sup>Imocac songoarengfocna, ngeneng warac nasosoc yoacna modacma kecgec, ngenec wegena kecbare enacna modacgec ifi isocngoc yaguc hereau kecbare ngeni yoacna modacmangoc wosokpidocfu nga fagung amma madzacgoc uatoa mema kecmagec nasoya hau komoc kpegecde.
- <sup>13</sup>Anutungo ua arenga gombunga fingerudeac ubaherenginau ua mekecde. Ifi mekefu ngeni efaigecde amma ua imoc megecdeac kuc ngenimekecde. <sup>14</sup>Ngenimekefu ngeni dehesi nga negengyohoha kpac kecma ua sasawa mebisia.
- <sup>15</sup>Ifi amma ngeni, ngicngac mangac manganea nga sing sege segea kecdae, yeneac botucfu Anutuac nambarac amma kopocsicngina kpac kecma kpetiac nga kongaha nanggecde. Namma Anutuac yoac kekehagoc mekecma asomeng isoc

bangectoa bangecfu mekperagiyemmegecde. <sup>16</sup> Ngeni ifi anggec, Kristoac nasotoau ngenaeac negemba wiac kuneng anude nga neannaac yofi negembade, ni sicsauc mong mi nedziai me uatoa imoc sicsauc mi meai. <sup>17</sup> Ngeni sesegerec isoc negen negensingngina mekecdae nga ngabafocna yeni sacna imocac witiau faigecdeu ni sifu songo negemma ngenigoc sogaiduae.\* <sup>18</sup> Nga ngeni sing imohaingoc songo negenggec nenahafoc sogaibisina.

<sup>19</sup> Kebu Yesungo negenu naric anu naso mi hereemanu Timoteo sueba haude. Amma yeng dzigenema ngeni dafi kecdae, imocac siduc edenuu ubana ngereeude. <sup>20</sup> Nocac ye isoc ngic ifia mong nigoc mi kecde, kpac. Ye mocgungo ngenaeac hafoangoc angkecde. <sup>21</sup> Nga ngicngac homac yeneng yenang wiacacsac negemma Yesu Kristoac uaac mong mi negengkecdae. <sup>22</sup> Nga Timoteo ye fakaya gombunga, ngeni imoc negendae. Ye medacngo mamagoc ua mekecde, if isoc nigoc siduc gombungac ua meficnuu mekecdipe. <sup>23</sup> Nga nearu sing dafi fingerude, imoc negenghomemaguc ye bic sueba haudeac negensiduae. <sup>24</sup> Amma Kebu negenserima yofi negeduae, neannaoc naso mi hereemanu ifingoc ngenearu habade.

<sup>25</sup> Anu tosona Epafodito sueba ye ngenearu monggoc haudeac negenduae. Ye nigoc ua mekecde amma nigoc kecma Kebuac

---

\* **2:17:** Anutungo songo negenudeac Yuda yeni sesegerecngina witiau waindoku kpakegec. Pauroac sac siric ifiu hetinggegede imocac sogaide. Bangec kisiu 15:3-10

wasai ngic ande. Nga ngeneng ye suegeg hama nanggekufung anenu wiac monggac mi obohobade. <sup>26</sup> Ye hafei ammiu siduha negenggec, imocac ye ngeneac fagung amma hereango ngeneac sasawa ammikecde. <sup>27</sup> Nga foracngoc, ye hafei ammiu homebesonga anec. Nga Anutungo yeacsac kpac, ni momoc ubamangang negennemecma ngerec ngeree meficgemiec. Ifi anu ubahodung kuneng mi fingecnec. <sup>28</sup> Nga ngeneng ye hemma ubangerec negenggecdeac nga neng ubahodunna kpac kecbadeac ye sueba ngenearu haude, imoc seria negensiyombonggeduae. <sup>29</sup> Nga ngeni Kebugoc kpeketahedaeac amma ye hafoangoc hoanggema ama heimima ye nga ngic ifia goa kecdae, yeni eweheihei ayemmebisia. <sup>30</sup> Nga ngeneng meficnugecdeac obohogecac yeng hama meficnuma Yesu Kristoac uaac amma sebua memanganema homebeso anecnoc.

### 3

<sup>1</sup> Yofi torokpema deduae. Tosofocna, ngeni Kebuaru kpeketahema sogac sogaigoc kecbisia. Ni yoc warac ohongemmeai imoc monggoc ohongemmecbadeac modzona mi tide, kpac. Imocngo kasongina anude.

<sup>2</sup> Ngic kasi isoc kecdae, ngeni ngic yeneac henghomema kecbisia. Amma ua ngic mangana, ngeni yeneac negenghomema kecbisia amma ngic sebingina herecgema manganegec, ngeni yeneac ifingoc henghomema kecbisia. <sup>3</sup> Anutuac Asungo faka nenearu meu Anutuac ua mekecdimbe, nenannoc sebi tosa herec

herecgea areng andimbe. Neni Yesu Kristoac negenni engena ande amma negen negensinnina nenannu mong mi fainide. <sup>4</sup> Nga neannaaru negen negenna faiba feudeac negemma sifu naric ambai, fora. Nga ngic goa yeneng yenannu negen negengngina faigec feande, ifi isoc faiba febac dede neng ifingoc feracyunuma ambaiac siriha. <sup>5</sup> Nga fingeaba uameme <sup>8</sup> ammanu sebi tosana herecgegec. Ni Israe arenunac nga Benyaminggac kisicfunac Hebiraio ngic yombong amma Hebiraio arenunac. Amma farisaioac sinnu dedeseriyoac modarai. <sup>6</sup> Ni ngombonggema kpebung yunukporac ayemmekefai amma dedeseriyoac mong mi ferahema ihai ngic dindingac kefai. <sup>7</sup> Nga warac wiac mekecma negemba memeficna anec, imoc ine yaguc Kristoac amma negemba memefiha kpac ande.

<sup>8</sup> Ni Kebuna Yesu Kristo ye negemmiba, imocngo memefiha engenatoa ande. Imocac amma warac kecma anai meai, imocac negemba memefiha kpac angkecede. Kekecnau Kristo mekecbadeac amma wiac sasawa negemba seuha andarec, imoc bic wayai. <sup>9</sup> Dedeseriyoac modacma neanna kucfu ngic dindingac ambadeac mi negensikecduae. Anutungo negen negensinggac sing yofi faiec, ngic mong ye Kristo negensinggeude, ye ngic dindingac anude. Ifiac amma Kristoaru kpeketaheba Anutungo nenu ngereeudeac anengande. <sup>10</sup> Amma Kristo yengena nga Anutuac kuc yengenaoc Kristo homecfunac megboriec, imoc negemmibadeac anende. Amma yegoc kecma kpendzeng kpema yeng homeec, ifi isoc homema ye isoc ambadeac



negenduae. <sup>11</sup> Ifi angkecbare nasoya hau homecfunac gborima yachbesonga negensiduae.

<sup>12</sup> Ni nedzi nedzi ua hafoangoc bic mesiai me firanggac sokoc bic meai, ifi mi deduae, kpac. Yesu Kristongo menuec, imocac amma imoc mebadeac nedzi nedzi ua mekecduaengoc. <sup>13</sup> Tosofocna, ni firanggac sokoc bic meai, ifi mi negensiduae. Amma ua mocgu yofi mema kecduae. Wiac bic anai, imoc monggoc mi negensikecduae nga wiac ngade fingerude, imoc mebadeac ua serima mekecbade. <sup>14</sup> Amma ni bic yombong kpe-teu sikema firanggac sokoc mebadeac nedziduae. Imocacnoc Anutungo kpacnunu Yesu Kristogoc kpeketahema kurumennu kecnide.

<sup>15</sup> Anu yadiseri bic aning, nenang sasawango ifi negensibisina. Nga ngeni wiac monggac nengגעec singa siriha mong anudeu Anutungo wiac sufu sufuya imoc ifingoc mekperagingem-meude. <sup>16</sup> Nga sing mocgu modacma haing, sing imocngoc modacma kembisina.

<sup>17</sup> Tosofocna, neng waraingemmeba ngeni imoc hemma siriha imocngoc modacnubisia. Amma ngic neac siric modackecdae, ngeni kicngina yenearu fibisia. <sup>18</sup> Warac naso homac yoac edengunukefai, imoc yaguc kiacgoc monggoc edengunuduae. Ngic homac yeneng Kristoac mariponggac ngaba amma kecdae. <sup>19</sup> Ngic ifia yeni hofeac areng anggecde. Heresebinginaac songo, imocngo kebungina angkecde. Nga fakangina gameagoc, imocngo yeneac ubangerec angkecde amma yeneac negen negensi imoc bangecac kekecfu fekecde.

<sup>20</sup> Nenang kurumenggac areng kecdimbe nga kpacnina kurumennu fede. Nga neni memen-gerecnina Kebu Yesu Kristoac tomai kecmi-na yeng ihacnac hama menunuu komoc kpenide.

<sup>21</sup> Ye wiac sasawa yengena bageu faiudeac kuc femide. Amma yeac kuc imocngo bangecsebinina makpekpea heimerenu yengena sebi isoc kuc nga kibikperagiagoc anude.

## 4

<sup>1</sup> Tosofocna, ngeni heresongogoc hoangn-gunuba herenango ngeneac ammikecde. Ngeneng sogac sogai meficgenemma neac irana andae. Nga songo tosofocna, ngeni imocac amma Kristoaru kpeketahama seria kecbisia.

<sup>2</sup> Euodia nga Sintike, ngeri Kebugoc kpeketahema kecma uba mocgu ambesera, dederecegyoac imoc edenguruduae. <sup>3</sup> Nga ogona geng yoac modackecnec amma nigoc ua mekecnecac desambic amma yofi edeguduae, ngac yohockang yomoc meficyurubesena. Nocac yeri nga Kremento amma ngicngac tosea goa kpacngina kekecac kibi-u fede, yeneng nigoc kecma siduc gombunggac ua arennu uatoa mema kecgec.

<sup>4</sup> Ngeni nasosoc Kebuaru kpeketahema kecma sogac sogaigoc kecbisia, monggoc deduae, ngeni sogac sogaigoc kecbisia. <sup>5</sup> Kebungo wegena kecde. Ngicngac sasawango ngeneac yumea kekec hen-tegecbisia. <sup>6</sup> Ngeneng wiac monggac negengy-ohoc mi ambisia. Amma ngeni wiac monggac

angemmede, imoc Anutuac kpara kpacma dengerema numumibisia. <sup>7</sup> Ifi ammagec Anutuac ru-aengo negen negentegec sasawa ferahede, imocngo ubaherengina nga negen negengnginaac kaso anu Yesu Kristoaru kpeketahema kecgcede.

<sup>8</sup> Tosofocna, yocac mong yofi debesonga negensiduae, faka fora nga ewehiheiagoc nga dindingac amma kongaha, faka henni songea angande amma negenni gombunga ande nga angammeme gombunga dengerenideac siric ande, faka sasawa ifiango negen negengngina mewakedacheso. <sup>9</sup> Nga neng negen negeng sasawa kpoungemmeba negenggec nga wiac nearunac kedzacnginango negenggec amma kicnginango henggec, ngeni ua imoc medachisia. Ngeni ifi anggec Anutungo ruaea ngemmema ngenigoc kefude.

<sup>10</sup> Ngeni monggoc neac negensima fakangina heigborima memeficna fainenggec, imocac Kebu dengerema sogaiduae. Ngeni warac bic neac negensigec, fora. Nga memeficac sing mong mi feecac obohoma wagec. <sup>11</sup> Ni wiac goaac obohoma dewaidzocyoc mi deanduae. Iwaina fenende, imocsac mekecma naric kecduae. Ifi kecbadeac negen negeng bic meai. <sup>12</sup> Nga makpekpea kekec nga finactoagoc kekec imoc tobanggema negenai. Amma yaka negebec kekec nga here home home kekec nga wiacna homac me efeanec kekec, Anutungo negen negeng imoc sasawa edzacnudarec.

<sup>13</sup> Kuc minginango negennemmanu wiac sasawa imoc naric andachade. <sup>14</sup> Ebicfu kecbareng ngeneng meficnugec, faka imocac negemba ngereede. <sup>15</sup> Siduc gombungac ua

hanac hanaheau Makedonia prowins wama kenaimoc, imoc Firipi kpebung ngenengsac hiedzoac arennu nanggenugec, imoc negendae. <sup>16</sup>Tesaronike taonnu kecma wiac kpedadanggeai, imoc ngeneng negemma ifingoc naso goa heimefic anemma fainenggec. <sup>17</sup>Ifi deba ngeneng wiac nenggecdeac monggoc derecgeduae, ifi mi negembisia. Ua megecac fora, imocngo yadiseri amma wiacngina kurumennu fede imocgoc torokpeude.

<sup>18</sup>Epafoditongo wiac goa ngeneahunac mehaecac wiac monggac mi oboho kecba wiacna ebiringoc fede. Nga wiac imocngo homung kerengagoc amma sese songea, Anutungo imoc henu ngereede. <sup>19</sup>Anutuna ye kperagia nga finac-toayagoc. Amma yeng ngeni wiac obohodaec, imoc Yesu Kristoac amma naric ngemmedarude. <sup>20</sup>Anutu ye Mannina. Yearu dedengerec nga dedengerec fekengkecheso, imoc fora.

<sup>21</sup>Kpetiac areng sasawango Yesu Kristogoc kpeketahema kecdae, ngeni yenearu wenacngerecnina edeyunubisia. Tosofocngina yei nigoc kecdimbe, yeneac wenacngerecngina ifingoc ngenearu hade. <sup>22</sup>Nga kpetiac areng sasawa yei kecdae, yeneng ifingoc ngeneac wenacngerec dedae. Amma Sisaac areng yeac amau kecdae, yeneng wenacngerecngina seria yombong faingemmedae.

<sup>23</sup>Kebunina Yesu Kristoac wosoefacngo ubaonganginagoc febeso.

**Yoac kekehagocac Dzadzahac gboria nga  
Mitiyegec  
The New Testament and Psalms in the Dedua  
Language of Papua New Guinea  
Buk Baibel long tokples Dedua long Niugini**

copyright © 2005 Wycliffe Bible Translators, Inc.

© 2012 Wycliffe Bible Translators, Inc.

Language: Dedua

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 3 Mar 2023 from source files dated 9 Oct 2020

19b7c48c-f4ce-5007-838d-58f01dc01ecc